



Minggu, 03 Oktober 2021
Ogen: Esekiel 16:23-34



"Gandil Tuhu-Tuhu"



Kalak ku juma ia ku rumah, kalak ku rumah i ku juma. Kalak si bagenda me nggambarkan kalak si gandil. Gandil seri ras ngelaini, la bali ras kalak sideban, la bagi arusna. Kepeken gandili enda la terjeng jadi i bas kebiasaan geluh, lit ka nge gandili i bas bas Dibata. Gandil i bas Dibata ertina la bagi kearusen geluh si isuraken Dibata.

Bangsa Israel iandingken bagi diberu perlua-lua. Rupa mejile icedainna alu erlua-lua ras kalak sideban sideban. Perbahanenna e maba rawa Dibata seh maka ibuat Dibata pasu-pasu i bas dirina nari. Si mamangna kal ate lanai pe ia ipasu-pasu la jadi persoalen man bana. Reh mekelekna ka lagu langkahna e me ngayak-ngayak bangsa si lain guna pepuaskan sura-surana. Jadi gundik pe labo dalih gelah puas. Nggit ia nggalar man kalak sideban segelah banci erlua-lua. Semalna kalak nge si nggalar man bana, enda ia pe si ngalar la jadi persoalen. Perbahanen si bagenda me tuhu-tuhu ngandili. Ngelaini. Sura-sura si la pernah puas erbahanca perbahanen bangsa enda nggandili. Janah tuhu-tuhu enda maba rawa Dibata.

Senina Moria, sura-sura daging si la erpuas-puas erbahanca nggit kita ngelakoken kai pe segelah tersehi sura-sura e. Perbahanen si nggandili pe ilakoken, tapi pernah nge lit kepuasan kenca si e silakoken? La pernah puas adi kita ngeluh ibabai sura-sura daging. Si enda erbahanca kita lanai ngeluh i teruh aturen Dibata. Ingetlah Kata Dibata si banci mengontrol kegeluhen bage pe sura-suranta seh maka kita ngeluh bagi sinisuraken Kristus.